

## Class 611 - Set Piece for Adults

### Lé Temps Pâssé par Livonia (Alice de Faye)

Lé temps pâssé i' n'fallait pon vaie,  
Les jannes fil'yes avec des braies;  
Il' avaient un court cotillon  
Dé gris bêlinge ou d'bliu molleton,  
Avec un p'tit bengône d'îndgienne.  
Il' en m'ttaient un net la s'maine,  
Avec eune coêffe bein poffée,  
Tchi n'tait pon souvent féthée;  
I' la poffaient avec du dgi,  
Et toute suite là tch'était finni.  
I' voulaient tréjous être bein coêffie,  
Car i' n'voulaient pon être êcrîngnie.  
Il' allaient en ville eune fais par an,  
Mais tréjous avec lus manman;  
I' n'allaient pon sus des bicyclettes,  
Mais tchiquefais dans lus bouonne tchéthette;  
Pour lus "holidays" en été,  
Il' allaient bein souvent au vrai.  
Et quand nou v'nait ès longues séthées,  
I' faisaient bein vite eune bouonne touônée,  
Pour ramâsser des flieurs et d'la feûgiéthe,  
Pouor dêcorer lus vielle jontchiéthe;  
Ch'tait pouor êt' dessus au sé,  
Pouor êt' touos ensembl'ye à ouvrer.  
I' faisaient des mellettes en jontchet,  
Pouor y pendre lus bouôn vièr crâsset;  
I' n'avaient pon bésouain dé piano,  
I' savaient touos lé chant d'*Malbro*.  
Eh bein, i' pâssaient bein lus temps,

Et trouvaient tréjous des galants;  
Pouor êt' bein seux d'êt' engagi,  
Lé garçon donnait pliat ou pangni;  
I' faîsaient tréjous lus neuches en cachette,  
lun allait par la route et l'aut' par les ruettes.  
Quand i' 'tait seu nou-s'allait tither,  
Et ch'tait assez pouor les êffriter.  
Mais, hélas! qué tout a changi,  
Dans notre chièr p'tit Jèrri.  
N'en v'là assez du temps pâssé,  
À la préchaine, il est mînniet.

Go to the Learn Jèrriais website to find the audio version of this...  
[www.learnjerriais.org.je](http://www.learnjerriais.org.je)

